

Editorial

“He biezy he nama hnohta ei reih haw hi, keima liata thlalôhpa ta nama y nawpata. Khizaw liata riethei pasapa ta nama y tyh; châhrasala thlalôh ngaitapa ta y teh u, kei ta khizaw ei tiah haw,” tah ta (Zhn. 16:33).

Atahma hlâ chhôn he, Pawla reipa hawhta, “Nohzy a pha khao leina daihti” a châ. Sawhkhâna riarina vâta adyuhna nata chariah thâtih sai ta thei awpa a châ. Sawhkhâ mianopa likawh liata, Zisu bie reipa hawhta, “Vachhuh hawhta nônai kawpa nata parih hawhta so ngaitapa ta” hrona daihti a châ. Hiakha lâ tawhta Kawrawna hripipa vâta potlana liata y pi ta, awnanopazy ta a tao tyhpa a pakhypazina zy, Sunday School achuna zy, awnanopa moh ta zawpi a pahmaohpasiahna zy y thai khao vei. Chavâta Khazohpa achhyna system a rao pathao ngâ. Potlana vâta sôh khodâh ta palie thai awpa châ khao vei. Potlana cha ta eima hneina zy maniah hrao pathao ta, eima daihti sôhpazy pachhâ ta, eima hrona sôh ngaitapa chhao a pahlei lymâ. Noh chareih ta ama kyhpachâpazy pakha hnohta pakha maniah siesai lymâ eita, harapa ta maniah ama siesai lymâ. Chavâta he

Potlana nata sawhkhâ riarina he ta chyhsa hro pachhipary ta, chihuhna pie ta, hnabeiseihna parao ta, hrona chhao thisao a chhuah ngâ. Chavâta noh chareih ta eima thlachhana ao cha, “Hy ABeipa y, he potlana nata chariahpa hry tawhta maniah pabohsa ma y” tahpa hi.

Cha hawhpa rairuna hry liata Khazohpa ta rairunazy he eima tyh lei awpa ta bie maniah a taih leipa ta, rairu chaina daihti lia chhaota eima hnohta y thlâh hâ ta, pahniekhei awpa ta bie maniah a taihpa Khazohpa eima hnei. Noh kha cha Zisu Krista ta a pachupazy cha Kalali tipo haosâ lâ chaka awpa ta pahrua ei ta, tipo liata ama sie nga no ta, thlihpi ru ngaitapa a tyh ei ta, ti chalaparapa nata thlihpi ta tha ta ama balyh cha vaw su ta, chyhsa kao lâ tawhta a pabohsa thai khao lei awpa duahmo liata y ei ta, tipo chhôn liata ama y hawpa vâta ama râ nawpa ta baona ama hia awpa chhao vaw hnei khao veih ei. Cha nota Zisu balyh chhôn liata a mô thlâh hâpa cha pahra ei ta, pachha awpa ta hiah ei ta, Zisu ta thlih nata tichalapara zy cha chhorei ta a pachha ei tahpa Biehrai liata eima hmô (Mk. 4:35-41).

Biehrai parahpa liata eima hmô hrapa cha, Zuzy Babelaw seichâna daihti liata Zu satlia mo pathôn: Shadraka, Mesaka nata Abenekô zy cha Babelaw beipa Nebukaneza nothlahpa achhy awpa ama khoh leipa vâta patina meihô liata chahry ta thy awpa ama châ haw. Nebukaneza palôn â eih thei via nawpa ta patina meihô cha lie sari pasahsa viapa cha liata amozy cha thypa ama

châ. Amo pathôhzy cha patina meihô liata thy taraw ei ta, chahasala, mei ta amozy chô liata biehei leipa ta, ama sâ chhao kê leipa ta, ama viahpakao pasipa chhao anano leipa ta, mei roh rai chhao pahnâh hra veih ei. Amo pathôh ama thy tarawpa ta patina meihô chô liata mo papalih hmô ei ta, a papalihna chhao Khazohpa hawhta a châ. Meihô rietheina liata thy lei awpa ta Khazohpa ta amozy cha ama chhâh a châ leipa ta, meihô liata ama thypa chhao ama hnohta Khazohpa ta a pahlao ei ta, mei tawhta a pachha ei tahpa eima pahno (Dan. 3:19-27).

Chavâta Zisu Krista bie maniah â taihpa cha riethei taona a tyh lei awpa châ vei. Rietheina hry tawhta eima hnohta ypâ ta pachha awpa he a châ. Zisu pachupazy cha tipo chhôn liata thlihpi ru ngaitapa a tyh hra ei sala, ama hnohta Zisu a y thlâhpa vâta cha thina tawhta pachhapa ama châ. Shadraka, Meska nata Abenekô zy chhao patina meihô liata thypa ama châpa chhao Khazohpa ta ama hnohta a ypâ thlâh hâpa vâta mei ta ama chôta parao thei khao leipa eita, pachhapa ama châ hra. Atanoh eima tyh haipa rairunazy Covid-19 potlana nata chariah adyuhna zy atyh hrahro lei awpa hlâta he rairuna liata ypâ ta maniah pachha awpa ta bie maniah â taihpa a châ.

KÔ KHOPHIE CHHÔH MARA AWNANOPA DUAHMO (March-August)

Rev. Dr. L. B. Siam
General Secretary

Biehmiapa

2021-2022 kô khophie taihta Khazohpa chhihtha phapa vâta ABeipa moh cha reithaipa y mawh sy. 2021 Feb. 1 nohta Pheisaizy ta chahraochatôhpa ta Sawhkha biehneina ama lapa nata Covid-19 hripipa heta eima awnanopa thata miah a hriapasa. Kô hropa hawhta Awnanopa a sie thei leipa chhao ta, September taih hmia eima tôh thei lymâpa he Khazohpa byhnâ a châ. Atahmâ March- August taih eima Awnanopa duahmo achyhta ei palâsa aw.

1. Pheisaih Sawkhana lana

2021 Feb. 1 noh ta Pheisaih Sawkhana a lapa khoh leina vâta Mararah liata lâthlôh a chhihpa hluhpi ama y. Sawhkha raihriapa thokhazy Civil Disobedience Movemnet (CDM) ama taopa vâta raihriana su siesaipa ta Mararah lâ luhi ama vaw ngai. Thokhazy cha su dârohpa nata thlâlôh viana su lâta ama râ. Yangon bia, Matupi bia, Hakha bia nata Paletwa bia liata local church zy thata ama taopasa. Mindat local church chhochhi ta atanoh ta ama duahmo parohpa tlô thei mah vei ei. Kihpi lâ tawhta eima râh a vaw pangaipa hry liata thokha niedo rairu viapazy cha eima Awnanopa ta achyhta sai a

deichhy ei. Chariah vâta sievawna pakhâ khaipa châ ta, khitly thaipa châ vei. CDM a taopazy hlao ama la khao leipa vâta rairuna a tyh ei ta, Awnanopa chhao thata miah a hriapasa hra.

2. Covid-19 Potlana

Covid-19 hripi tawhta avaih nawpa ta June 23 noh tawhta MEC local church zydua zawpi apakhyna, ahmâna, Sunday school achuna, Bie achuna nata pakhyipi hawhpa zydua tao mah leipa awpa ta chalihsapa a châ. Local thokha cha Awnanopa Machâ bia chy ta peimawhpazy chakaona ama hnei. Awnanopa Noh Peimawhpazy chhao hmâ thaipa châ khao vei. Matupi Township tawhta patoh-patiana ta Lialaipi liata mo (200) Covid-19 vaccine aka theipa a châ.

3. Bia, Local nata Achhyna O pahyna

2021 Assembly Executive Meeting paryhna zie hawhta Chakhai liata Salem Local Church nata achhyna o cha March 27-28, 2021 noh ta pahypa a châ. April 3, 2021 noh ta Paletwa Achhyna o pahyna, April 4 noh ta Aru Pastor Bia pahyna, May 2 noh ta Shinletwa Pastor Bia pahyna nata May 9 noh ta Mala Pastor Bia nata Pastor Quarters pahyna hneipa a châ.

4. Pastor Chahnaopa nata chakaona

2021 AEC Meeting paryhna zie hawhta March 7, 2021 noh ta Saya Sâbie (Tisi) cha Sabawngpi Local Church liata Pro. Pastor ta pa-ipa a châ. 2021 April 4 noh ta Paletwa local church liata Mission field liata chakaotuhpa

Pro. Htein Lone, Pro. Sanai Lwin, Pro. Aung Tun, Pro. Vabeilua zy cha Ordination piepa nata Evan. Kyar Hla Aung cha Mission Pastor châta chahnaopa ama châ. USA liata Pro. Pastor Khaitha (Texas) cha Ordination pie awpa nata Kentucky liata Saya Moe Kyaw Thu (a) John Bawinawl cha Pro. Pastor châta September hâta ei khana liata hnei awpa Church Council pakhyi liata chanao/pa-i awpa a châ.

Hlegu Pastor Rev. Beikhai (M.Th a vaw patlô thiehpa), LTC pachutuhpa Rev. Pa Hmo, Rev. Si Khei, Mindat Pastor Rev. K. Zahne zy cha râh buana nata Covid-19 vâta Mararah lâ ama khy ha chy.

5. Meeting

Covid-19 vâta Assembly ry liata Meeting thokha chalihsa chypa a châ. AMC meeting ei kha (June 4), OB meeting ei (4) tao theipa a châ. Rai hropa chakaona nata thina vâta meeting member thokha he hawhta pathlai (raopa) a châ: Pastoral Ministry Committee member Mch. Chhatlei vyuhpa ta Mch. Nawtha, KPP Central C'tee advisors châta Rev. Hla Aung & Mch. Khyte (Sabyh), Social Concern C'tee member Mch. Kholai (Heimata) vyuhpa ta Mch. Kôchhai (Peite) a tlypa ama châ.

6. Assembly Sôh

Sawhka riarina nata Covid-19 vâta local to ta sôh rairuna ama tyh. Sôh thyu pha kaw tyhpa khihpi local church-zy chhao sôh duahmo thata ama tla pahnai haw. Sievaw rairuna nata sôh angiahpa achyhma vâta Office lâta sôh a vaw ngiahpa pastor ama vaw tlô chyh kaw. Chavâta Awananopa project zydua chalihsapa châ ta,

hriatuhpazy hlao deita he hmiapasâhpa a châ. Awnanopa ta bank liata phusa eima hnei tlakaihpa chhao thao thai mah khao leipa a châ. USA Church Council tawhta chhao sôh paphao awpa y taraw ta, bank liata taka thao thaipa a châ leipa vâta sôh vaw paphao thei mah hra vei ei. Râh hropa liata local-zy tawhta chhao sôh miah paphao thei khao vei ei. Chavâta atakô chhôn cha achhyna o nata quarters baona chhao pie thei mah leipa a châ.

Sôh rairuna a ypa vâta MMM nata LTC liata hriatuhpazy bonus eima pie tyhpa chhao pie thei khao leipa a châ. MMM liata mo pakha ta thla kha ta Ks. 70,000/- nata LTC hriatuhpa pakha ta Ks. 30,000/- pie tyhpazy chhao pie khao leipa a châ.

7. Relief

Eima Sawhkha riarina nata Covid-19 vâta rairupazy deichhyna châta Relief he hawhta hmô theipa a châ.

1. FELM Relief Sôh Ks. 172,50,000/-
2. Hong Kong Evan. Lutheran Church Ks. 26,50,000/-
3. Health & Home (UK) Ks. 332,22,000/-
4. Joint (MEC-HHM-TSD sapha bag 100 Ks. 35,00,000/-

Khihpi nata Mararah local church to lâta rairuna duahmo mopâpa ta deichhyna Ks. 153,00,000/- pie theipa a châ. Sapha lâta Synod 1 châta Bag 200, Synod 2 & 3 lâta Bag 308, Synod 4 châta Bag 200, Synod 5 châta Bag 100 piepa a châ. Sapha raipa he 50% amâ pachhôpa ta piepa a châ. Awnanopa rairu chaina daihti liata deichhyna miah pietuhpazy lâta alyna bie eima hlâ.

8. Calvary Clinic

Eima râh buana nata Covid-19 heta Mara Awnanopa ta alei thei leipa ta Clinic padua awpa ta miah â haw. Chavâta June 26 noh ta Calvary Clinic pahypa a châ. Calvary Clinic Managing Board paduapa ta mohôhpa a châ. Clinic he Unit 3 ta pachhaihpa a châ. General Healthcare, Covid-19 Response Centre nata Care & Counseling tahpa a châ. Hnatlana lâ kyh liata achupazy ta amâ leipa ta miah deichhy. He Clinic pathaona châta he hawhta sôh thyupa a châ.

1. MEC Relief Fund	Ks. 60,00,000/-
2. HH (UK)	Ks. 50,00,000/-
3. Joint (MEC-HHM-TSD)	Ks. 50,00,000/-
4. TSD	Ks. 40,00,000/-
5. <u>United Lailenpi</u>	<u>Ks. 10,00,000/-</u>
<u>Total</u>	<u>Ks, 210,00,000/-</u>

He Clinic moh ta Covid-19 test tao lymapa a châ. He Clinic châta phu/py nata mo pakha ta deichhynazy hmô pi ta ama zydua chô liata alyna bie eima hlâ.

9. Mission

March-May liata Evangelist zy chakaona vâta Mararah liata Thâtihpa Ahrana thata a tlô. Thyutliazy Khazohpa bie liata a hra ei ta, eima ly ngaita kaw. June thla tawh deikua cha apakhyna zy chalihsa chypa a châ hawpa vâta ahmâna hnei thaipa châ khao vei.

Mission field liata Mission Director chhao May hâtâ ei nona liata a chhôhkha chhao EMM Office a tlô thei haw. Atakô cha sôh rairuna vâta EMM hriatuhpazy chhao

thla ta to ta hlao pie thei leipa a châ. Chaleipa chhao ta, Sawhkha riarina nata Covid-19 vâta field to ama rairu kaw. Yziana, niedo nata khihsana liata rairuna y ta, kô hropa hawhta Thâtihipha chho awpa ta sievawna tao thei leipa a châ.

Atakô September Apahrana châta Rev. Dr. Zôdau ta a pachhuahpanohpa “Mission Chakaona he Thlahpa Raihria a châ” tahpa bu achu awpa a châ. He heta eima awnanopa mission chakaona liata thatlôna hnawh a châ awpa eima beiseih.

10. Siku Khawna

Mara Awnanopa ta a hneipa Lorrain Theological College nata Maraland Morning Moon Private High School cha 2020, 2021 kô 2 chhôn tlai khawpa a châ chy. Hriatuhpazy deikua cha raihria chakaona tovyuh piepa ta ama chakao pazao lyma hra.

Biepachhana

Awnanopa cha Khazohpa eih a châpa vâta rairuna ti chatlao nga hrâ sala, ABeipa ta hrona a pazao lyma aw. Atakô he kô hropazy hlâta eima rie thei hra sala, kô chhâna taihta Ano ta miah chhihtha aw tahpa eima ngiapâ. Kô khophie chhôn Awnanopa duahmo eima moh khiahtala, siesaipa ta y mah pi, Khazohpa cha eima hry liata â phualuah lymâ tahpa hmô thei awpa a châ. Chavâta Awnanopa sahlao zydua ta, tiama kawpa ta thlahchha ei sila, he Awnanopa Balyh laipa he ABeipa ta miah chhihtha lyma mawh sy.

CALVARY CLINIC PADUANA REPORT**Rev. Dr. Zôdau****Education Secretary****Biehmiapa**

2021 May thla tawhta Covid-19 tily ei 3na heta Myanmar rân nata Chin State liata a vaw chatlao pathao haw. Eimâ hnia viapa Matupi, Gangaw, Mararâ Leikâ lia taihta Covid-19 hri veihpa ama vaw y pathao haw. Matupi, Gangaw, Kalay, Pakokku nata Hekha tawhta a vaw tlôpa nata khitlypa ama hlulh via nga. Sawhkhâ riarina vâta MCPC nata VCPC zy ta khodâh hawhta Covid-19 avaina raihria thei khao hra veih ei. Lialaipi thohna o liata hriatuhpa hlulh via cha CDM tao haw eita, thohna o chhao khawpa a châ haw. Chavâta Mararâ liata a tlâh leipazy mohôhna nata thohna chalei nawpa y khao vei. Chavâta he heta Mara sawzy tha ta maniah pahao ta Mara sawzy châta avaina nata a mohôhna chhao peimawh ngaitapa duahmo liata eima y hawpa vâta hmah la pathaopa a châ.

Hmala Pathaona

June 30, 2021 noh ta Rev. Dr. L. B. Siam, Rev. Dr. Zôdau, nata Dr. Aung Ko Ko Tun zy ta Covid-19 tawhta avaina, hri a veihpazy mohôhna nata Clinic paduapa châ sala, abyuhpa chhaichhi kyh reipahmaohna hneipa a châ. July 2, 2021 noh ta Awnanopa nata Lialaipi nôpaw zy mo 11 ta MEC Office liata a tyhna hneipa châ ta, Covid-19 Response Centre nata Clinic hnei awpa khopasana kyh reipa a châ. Rev. Dr. L. B. Siam nata Rev. Mai Ki zy ta

Clinic padua thei nawpa ta policy ama vaw tao awpa ta paryhsapa a châ. July 3, 2021 noh ta MEC Office liata abyuhpazy patôhpatia chhielie awpa ta Rev. Dr. L. B. Siama, Rev. Dr. Zôdau, Dr. Aung Ko Ko Tun nata Sayama Dipar zy atyhna hneipa châ ta, Covid-19 Response Centre su awpa nata Clinic su awpa ta KNP-KHD nata COME lâta survey taopa a châ. Cha noh tlai ta Rev. Dr. L. B. Siama, Rev. Dr. Zôdau, Sayama Dipar nata Saya Khaitha zy ta General Secretary Quarter liata a tyhpa ta Mararâ châta thohna a byuhpa nata chhaichhi kyh reipa a châ heih.

July 4, 2021 (Sun) nohchhô ta Lialaipi liata local sa 3 liata OB zy hruapa ta MEC Office liata a tyhna hnei heihpa a châ. Cha liata a tlôtheipazy mo 20 ama châ. Atyhna liata MEC ta Covid-19 Response Centre nata Clinic tao awpa achhuahna liata Lialaipi Bia heta âbyuhna hawhta thâ patlôkhei awpa nata hrialâh awpa ta kyh reipa a châ. July 5, 2021 noh ta Lialaipi Vaihpi local tawhta mo 17, nata Lialaipi A tawhta mo 17 cha COME saku liata Covid-19 Response Centre châta pasipathai ei ta, L. Satation tawhta mo 12 ta KNP_KHD o cha Clinic châta pasipathaina rai ama hria. July 6, 2021 noh ta MEC Assembly moh ta Mara Autonomous District Council (MADC) lâta Covid-19 avaina chhaichhi hiapa châ ta, eima hiana zy papeisa ngaitapa ta Test Kit zy, PPE zy, Handgel zy nata Mask zy hluhpi maniah ama vaw pie. July 6, 2021 noh ta Dr. Sakie (HHM) hnohta CRC châta nata Clinic châta abyuhpa chhaichhi nata thohna zy deichhy thei awpa ta châ ropa a châ. July 7, 2021 noh ta CRC nata

Clinic kyh rei awpa ta MEC Office Bearers Meeting ei 11na pahruapa a châ.

Clinic Thâti

MEC Office Bearers ta MEC ta Clinic tao awpa cha a pha tah ta, a moh “Calvary Clinic” tahpa moh biepa a châ. A Motto cha “Keimo ta mohôh pita, Khazohpa ta a patlâh (We nurse, God cures)” (Mt. 10:8) a châ. Clinic a mohôh awpa ta Calvary Clinic Managing Board (CCMB) paduapa châ ta, Board memberzy cha:

1. Chairperson Rev. Dr. L. B. Siam
2. Vice Chairperson Rev. Dr. Si Khaw
3. Secretary Rev. Dr. Zôdau
4. Assistent Secretary Sayama Dipar
5. Finance Secretary Rev. Mai Ki
6. Information Secretary Machâ Abizah
7. Treasurer Machâ Zasaw
8. Executive Mambers
 - a. Macha Heichha (Ficility Resource Mobilization)
 - b. Rev. Satu Ve u (Care and Counseling)
 - c. Dr. Juli Aye (General Health)
 - d. Sayama Sôdei (Emergency Response)
 - e. Saya Khaitha (General Response)

Calvary Clinic cha a raihriana Unit mia 3 lâta pachhaihpa a châ. Unit 1: General Healthcare; He Unit liata a tlâh leipazy mohôhna a châ. Unit 2: Covid-19 Response Centre; He Unit heta Covid-19 avaina, hri a veihpa mohôhna a tao. Atanoh taih ta Nochhi Mararâ chhôn liata Covid-19 hri a veihpa eima y mâh leipa vâta

eima ly hmeiseih. Unit 3: Care & Counseling zy a châ. He Unit ta chyhsa palôh tha a tlô leipazy tha patlôna rai a hria. Clinic su cha KNP-KHD ta paryhpa châ ta, he su liata July 26, 2021 noh ta MEC Dy Moderator Rev. C. Sitlô ta pahyna a hnei haw. Clinic hlao tloh thei nawpa ta sôh peimawh ta cha sôh cha MEC tawhta Ks. 60,00000/, MEC-HHM-TSD Joint tawhta Ks. 50,00000/-, HHM tawhta Ks. 50,00000/-, TSD tawhta 40,00000/- nata United Lailenpi tawhta Ks. 10,00000/- tah starting fund pahmaohpa a châ. Clini a duapazao thei nawpa ta CCMB ta phu nata py zy lâta baona hiah thei aw ta, local church to lâta chhao baona a hiah thei hra aw. Chyhsa mo pakha hnohta chhao baona a hiah thei hra aw. Atahma chhao USA Indianapolis MEC tawhta Oxygen Concentrator, Oximeter nata Almerâ zy chaleina châta Ks. 26,00000/- maniah ama vaw pie haw.

Bie Pachhasana

MEC ta Calvary Clinic a vaw padua theipa he a ly a chhieh kaw. A daihti chhao a châ. A tlâh leipazy thlapalôhna châta, Zisu Krista chakaona chhao a châ. Awnanopa ta patlâhna raihria liata ahlaona chhao a châ. Covid-19 daihti a châpa vâta a eih viapa ta peimawh hialiapa a châ. Chavâta eima Clinic châta thlachhâkhei sila, Khazohpa eima râh patlâhna chhaichhi miakha ta a hmâ thei hra nawpa ta deichhy sila, a châkhei hra suh vy!

CHI KAW SIH LA, CHI KHAH SUH U!

Laiu Fachhai

Kawrawnâ potlana hri **pipa** ta khizaw pi a chanaoh tawhta kôkha nata khophie tlai a vaw châ haw. Râh thokha liata pha viana lâ a pangai nota, râh thokha liata deikua cha, aparua via ngâ kawpa a lyu. Avaina thohna (Vaccine), hmiakhu (Mask) nata hri thiena (Sanitizer) ataopa kompanizy ta sôhpaliena lâ tawhta saipa ta athôhna ama hmô nota, zawpi deikua cha khihsa rairunazy atyh pi ta, potlana hri ta maniah pasasa ta eima thi ngâ kaw. Marapa chhao kawrawnâ potlana hri ta pasa pi ta, Abeipa ngia-chhiena vâta ahluk via ama tlâh nota, athipa chhao eima y pathao ha hra. Atahmâ chhochhi cha â paka a nao viapa nata pasana rupa nata thina chhao a tlôkhei patoh theipa kawrawnâ hri chapeih apua hapa hawhta athaipazy ta reih ei ta, chi â chhieh ngâsâ thlâh ha. Chi lei thai'pa châ vei. Chi awpa potlana hri pipa tlai a châ. Chi ngaita ei suh u.

Chi kaw ei suh u

Chavâta Kawrawnâ potlana hri he chi kaw sih la, athaipazy ta avaina maniah ama chhopazy zyh lyhlia a chhuah ei suh u. Biehraih chhao ta hriiah cha a vaih awpa nata aphapa ta mohôh awpa a chazie maniah a pachu hra. "Abeipa na Khazohpa ao pakhâ tata nathliepa ta, a môhmô liata hmo dopa taopa ta a biepiepazy nathlie la, a bieraopazy na zyh khihta cha, Izi mo chô liata hri ei patlôsapazy kha, na chô liata kheihawhpa hmah patlôsa aw va na, kei he Abeipa châ patlâtuhpa ei châ" (Pua. 15:26). "Chyhsa sopa cha hmô chichhihpa hmô thaipa ta a nyusai ta, ahrupa deikua cha hria ta pasa a tao tyh" (Bis.

22:3). “Ti deita doh thlah ha khao leipa la, na pavyhpi châta nata na pasa ngâ thlâh ha tyhpa vâta Kresawti chhao a chyhta do pâ tyh mah y” (1 Tim. 5:23).

He biehraï biezy tawhna heta hnatlâna phapa eima hnei thei nawpa ta , a vaih ta, a mohôh pha ta athaipazy ta tao aw nata tao lei awpa ama tahpazy eima zy awpa a byuhzie a palâsa. Kawrawnâ potlana hri pipa tawhta eimâ boh thei nawpa ta, athaipazy ta he hawhta a vaih ta, tao awpa nata tao lei awpazy maniah ama chho.

1. O chareichakâ mâh leipa ta y chy awpa
2. Lei thei leipa vâta pua awpa â byuh khihta cha, mohropazy nahta dy pangawh ahlapa ta y awpa
3. Khô pua tita hmiakhu (mask) hmâ lymâ awpa
4. Ziza liata khasâ rakha taih ma a zaw theipa hri a châzie athaipazy ta ama reipa vâta eima pochih, dâh khaw, Karaoti, sâdâ nata khaini paôna, kuvâ nienazy pachhao chakhyh lei awpa pachhao ângiah ha khihta cha ie o liata pachhao tyh awpa, eima hna chhao hno cha khyh leipata, rumâ liata tlyma ie o liata tlyma hno lymâ awpa.
5. Eima hâthih tita nata pakhu tita eima hnapasu nata hmao rumâ ta tlyma eima viapakao bâh ta tlyma pamai lymâ awpa
6. Ri chhao a kia tu mâh lei awpa, He hmo he hmo ru ngaitapa la a châ. Eima sanaw rinôzy, opa lyuhrizy, viasa rikhazy, kaolâh hrialâh zy nata khihkha râhkazy ri kia leipa cha, tao thai a ru ngâsâ. Chahrasala potlana hri charei daihti a châpa vâta â pyzie thai awpa a peimawh ngaita, Potlana hri charei daihti hela, thi nawpa daihti pha chaipa a vaw châ tlai vei. Châhrasala potlana hri ta thlua hlei a hei leipa hawhta, thina daihtia chhao keimo

khotlyna liata a y vei tawhta cha, potlana daihti liata a thipazy ama y tita, rikiana kyh liata athaipazy ta zyh awpa ama tahpazy lyhlia a pha.

7. Ahneina nata alyna kyhchhizy tao mâh lei awpa. Nôvah a hnei khohpazy cha, kyhchhi leipa ta, thopi chhao tao hra leipa ta, abuah thei chaipa hawhta tao awpa. Pastaw, Awnano chhituhpa pakha pano, chhôhkha lâ pathôh papalih, viasa rihchâh pathô papalih rakhata ta ahneina taopa a pha chy.
8. Ku asi hluh ta ti lalôhpa doh hluh ta ti hu ta apahu pâ tyhta, phei ruapa ta alei sapa liata ahlaihlâpa ta esasai la lymâ awpa
9. Viatamin C nata hnatlâna châta aphapa thohna hropa-zy niepa ta, a vaina thohna (Vaccination) chhao la awpa
10. Hnatlâ phapa ta eima y lymâ thei nawpa ta, Khazohpa biepiepazy zyha ta, yzie, niedo, paôpazypa nata paritheipazy liata thata a sohsi awpa, Hri hropa a ohpa nata paôpazypa nata paritheipa a taopazy ta kawrawnâ hri ama oh chhi khiahta cha ama pasa khei via pachai na tahpa ta athaipazy ta ama reih. Chavâta a sohsi kaw awpa a byuh.

Thlahchhâna châta, he tao awpa nata tao lei awpazy he eima zyh khiahta cha, Kawrawnâ hri tawhta a boh theipa a châ. Cha nota, kheih na kheih ta ma hri â oh thei. Cha hawhta hri ta maniah a tlô thlu tita, thlahzo pachârôhpa ta deikua y khah ei suh u.

Chi khah ei suh u

Kawrawnâ potlana hri cha chichhih kaw tlai ta, chavâta hri ma-niah a kia lei nawpa ta avaina tota eima

vai awpa cha ngiapâuhpazy taozie awpa nata hrozie awpa tlai a châ. Cha nota, pachârôh thlahzoh pa nata palôh chhâpa ta deikua eima y awpa châ leipa ta, chipa nata chalyupa ta, hro hnabeidypa ta eimay awpa châ hra vei. Ngiapâuhpa eima châpa hawhta ABeipa eima Khazohpa lâ oh sih la, ano liata eima china nata ngiarohna zydua pahnieh sih la, pachhô ei suh u.

Khazohpa cha eima pasana nata nôpona daihti liata

1. Miah hmô ta eima pasataona a pahno (Âth. 16:13)
2. Eima awna, eima hiapa nata eima thlahchhanazy a thei (Zn. 2:2)
3. Eima hnohta a y (Hla. 23:4)
4. Eima chhâh â châh (Chap. 3:33)
5. Eima pasataona apahno (Pua. 2:25)
6. Pasa eima tao nota maniah â hnia (Hla. 34:18)
7. Khazohpa cha miah patlâuhpa a châ. (Pua. 15:26)

Kawrawnâ hri tawh chhao ta maniah vaih thei ta, maniah a patlâ thei. Chavâta Kawrawnâ potlana hri pipa tawhta eimâ boh thei nawpa ta, he hripipa he chi kaw sih la, a thaipazy ta tao awpa nata tao lei awpa miah ama chhopazy zyh lyhlia a chhuah ei suh u. Cha no ta, Khazohpa eima hnohta a y tahpa a theipa ta, thlahzo pachârôh nôpopa ta y khah eisuh u. Hro cha kawrawnâ hry liata chhao a sie lymâ awpa byuh ta, Khazohpa eima chakao tyhpa hawhta eima chakao pazao lymâ awpa a châ. Kawrawnâ vâta tlyma, hri hropa vâta tlyma, apiepasina vâta tlyma eima thi hapa chhao ta, ngiapâuhpazy châta cha eima chhâna châ vei. Su pha viapa, kawrawnâ nata pasana hropazy y khao leina tlyzaw su lâ a siepa eima châ.

ABeipa ta a bie byhnâ bie mawh sy! Amen

RYHPA NATA NGIAPÂNA**Rev. A. Râkhai***(Executive Secretary, Mission)*

Ryha nata ngiachhiena hawrawh bie eima hmô nata Mawsi nata Zisu thlai miah pahnosa kaw. He hawrawh bie he eimâ ngiapâna liata thokha châta cha noraih âchhih kawpa hawhta ama hmô. Thokha heihta cha MEC Awanopa cha ryha ta thai châ a chhuahpa, ryha ta pachha châ a chhuah penawh ama tah heih hra. Chavâta ryha nata ngiachhiena kyh he arylâ hawhta eima vaw rei pasia tua aw.

Ryha he Zenitaizy hnohta piepa châ leipa ta Khazohpa chyhsazy ama hro a do, pathai thei nawpata piepa a châ. Pahno thai nawpa ta ryha he lzi mo Phirao Sawhkhâ liata piepa châ leipa ta sei châna tawhta a vaw puapa Izarel saw (Khazohpa chyhsa) khotalai penawh hnohta piepa a châ. Chavâta ryha he cha angiapâpa, Khazohpa chyhsa, moleina sei châna tawhta khotalaina râh lâ a pua hawpazy châta a châ. Ryha cha Krista âvaw luah hlâta vaituhpa a châ (Kal. 3: 21-24).

Ngiachhiena cha kyhpachâna tawh a vaw puapa hmo châ ta, ngiapâna ta topa/hmôpa hmo a châ. Pakhona ta Abaraha cha Khazohpa ta a hnohta bie areipa kha thei ta, pachâ ta, pahno ta, angiapâ ta, cha ângiapâna cha siana ta raopa a châ. Abaraha chyhsa siapa châna cha hmotaona (Hmopha) vâta châ leipa ta angiapâna vâta a hmôpa tiao a châ. Chyhsa siapa Khazohpa chyhsa a châna ngiâna awpa (Sign) cha chopawtaina a châ. Chopawtaina

he sia nawpa, angiapâ nawpa ta ama pataisapa châ leipa ta, angiapâpa chyhsa siapa, Khazohpa chyhsa a châpa vâta chopaw tlaô ama tai (Rm. 4: 9-12).

Ryha liata pachha châna he Pawla Kalatia râh Awnanopa avaw padua tawhta Zu chyhsa Pharisaizy hry liata Zisu avaw ngiapâtuhpazy ta “Mawsi ryha hawhta chopaw nama tai leipa khihtala, pachha châ thei aw va ei chi” (Ht. 15:1) tahpa unawzy ama pachu haw. He pachuna heta Kalitia mozy Awnanopa liata athata buana atlô kheh haw. He liata Pawla ta ryha a tahpa he apheina, paruna, liany cheina hawpa ryha châ vei, chopaw taina ryha he tlaô a châ, he pachuna vâta Zerusale Council liata Zenitaizy Zisu angiapâtuha he chopaw amâ tai aw ma tahpa ama rei pahmaopa châ ta, he hawhta bie ama pathlu. Apawsataw Zami reipa “Zenitaizy hryta Khazohpa lâ aheihpazy cha ama rie pathei leipa (Chopaw tai leipa) ei sila, nothlapa achhyna hmo pathai leipa niepazy, apheinazy, pa-ao saopa nata thisai nienazy bâsai awpa ta amo lâta châ tlaô paphao ei sila ama tah” (Ht. 15: 16-20).

Pachha châ nawpa ta Mawsi ryha hawhta chopaw nama pataisa khihtala, Krista cha nama châta khâpa hmah pahnai aw vei. Ryha vâta ahyhma thai châ thei va ei tahpa (Kal. 5:2-3), ryha ta thai châ achhuapa sai u, Krista nata namâ chhah haw (Kal. 5:4). Ngiachhiena nama pao sai haw a vaw tah. Zu ngiapâtuhpazy chopaw taina he siana hawhta ama pachâ. Pawla ta ngiapâna he siana a châ tahpa a eina athata a ypa vâta “Chopaw taina

kyh ei chho khihtala, adopa a châ khihtala, pasatao awpa nata buana châ aw vei (Kal. 5:11).

Pachha châna cha ngiapâna vâta ngiachhie ta a châpa a châ. Keimo cha Thlahpa zawhzi ta ngiapâna ta siana hnabeiseihna hâ tlô pita (Kal. 5:5). Mawsi ryhpa liata angiapâna (Sign) cha chopaw taina châ ta, Zisu Krista liata angiapâna ngiâna cha Thlahpa ta bâtina a châ. Thokha ngiapâtuhpazy ta angiapâna khotalaina he moleina taona (License) pasaina hawhta ama pachâ. Khotalaina he molei sei châna tawh puana châ ta, ngiachhiena vâta a châ. Pahno thai nawpa ta Izi sei châna, Babylaw sei châna tawh khotalaina (Puana) cha Khazohpa vâ deita a châ. Zubilee dawh chhao khotalaina puana châ ta, ngiachhiena a châ hra. Keimo chhao Krista Zisu lia angiapâna vâ deita thai pachâsa, siana, Khazohpa chyhsa raopa a châ.

Chavâta ryhpa nata ngiachhiena, ryhpa nata ngiapâna tahpa hawrawh tlao a pha via. Ryhpa vâta thai châna y leipa ta ngiapâna vâta siana thai châna tlao a châ. Ngiapâtuhpazy châta ngiapâna cha eima siana châ ta, ryhpa he eima pathaina a châ. Ryhpa zyhna he siana awpa châ leipa ta siana thei tlao a châ. Cha cha Thlahpa Pathaihpa theilâpa ama tah. Zisu Krista daihti liata Mawsi ryhpa hlâta a-i viapa cha “Na kyh na pachâpa hawhta na vai kyh na pachâ awpa a châ (Th. 19:18, Rm. 13:9)” he Krizyha hro liata ryhpa zyhna nata ngiachhiena pahno penaw hro, Krista hro tlao a châ. Awnanopazy ta Zisu Krista zawhzi ta Thlahpa Pathaihpa liata chareipa ta ngiachhiena liata hro pathai nawpa ta kyhpachâna ryhpa liata tlao khotalai ei su u!

THÂTIHPHA CHAKAONA LIATA PASAIPHA
REV. DR. PAUL K KYAING

Rev. Dr. Zôdau

Education Secretary

Rev. Dr. Paul K. Kyaing he Hloma khih Puhpa Zawbau sawchapawpa a châ.1955 kô ta a nô ta maphie-pa ta sa eita, a utaenô cha Thlieche (Ngobinô, Rev. Khaibie nô) a châ. Ano a vaw pi nota a hu leipa ta a vaw pihpa a châ. Ano a pi noh ta India tawhta Misawnarizy Hloma ama vaw tlô no a chhyh ta, thlachha-pa ei ta, Khazohpa ta a vaw pahropa a châpa vâta “Thina tawhta a vaw hro heihpa” tahpa ta “Pawla” ama vaw bie. A nô ta â ly tupa vâta “Kheichai” tahpa ta a moh ama vaw biepâ hra. Chavâta Misawnarizy ta ama biepa moh nata a nô nata paw biepa moh pahlypa ta Pawla Kheichai (Paul K. Kyaing) tahpa ta ama vaw biepa a châ.

Primary achuna he Sabyh khih liata vaw hnei. Middle school he Lialaipi liata a vaw chu. Lialaipi lâta a paw unawhpa Puhpa Hienau (Laichhôpaw) hnohta a vaw y. Pinô Laichhô nô (Pihnô Awhzai) he Pu Matlei, MP sietanô a châ. Chavâta Matupi liata Pupa Matlei hnohta High school a vaw chu. Matupi liata saku a kia nga nota St. Tlaivâ (Pamai) nata Pupa Matlei hnoh zipa ta 1969 ta Thailand râh lâta ama sie. Thailand râh tawhta Burma râh adyuhna liata vaw y ta, riahphapa a châpa vâta awhsi po 3pa (Captain) taih duahmo a vaw phapa a châ. Nohkha cha chariah adyuhna liata ama y nota Malaria pasana ta tha ta a pasapa vâta a theihlô khao leipa ta Helicopter ta

Bangkok khihpi thohna o America mission ta a paduapa lâta tlôkheipa a châ. Cha liata Nurse zy ta mohôh ei ta, a vaw tlâh via tawhta thâtihipha chho lymâ ta, cha tawhta Zisu Krista Thâtihipha a vaw pahnop a châ.

Zisu Krista Thâtihipha a pahno haw bâpa vâta Iyurâh liata Burma râh adyuh awpa khoh khao leipa ta sawhkhâ ta râh adyuhpazy a awna daihti liata Tachilayk khihpi liata 1980 rachhôn liata Burma râh a vaw ngiah heih. Sawhka tawhta a tao khotha patlysa eita, ano cha châ achu awpa a tlyh ta, a kô machâ hawpa chhaota Kyaington High school liata py 10 a vaw chu ta hlao a vaw tloh thei. Pyhrawh hlao a vaw tloh tawhta sawhka nata bie ama taihpa hawhta sawhkhâ liata Village Council clerk rai a vaw chakao. Amoh ta sawhka rai hria ta, anodeikua Lahu râh liata thâtihipha chho lymâpa ta Misawnari cha Clerk hlao ta a vaw chakao lymâ.

Thâtihipha chho awpa khachâ a khotha vâta sawhkhâ rai cha bâhsai ta, Myanmar Campaus Crisade for Christ liata training vaw kiah ta thâtihipha chhona dâhzy a vaw chu. Cha tawhta Burma râh liata thâtihipha chho lymâ ta, Burma râh liata thâtihipha lâta mohpathâhpa Dr. Thei Htay zy, Dr. Tin Maung Tun zy nata thâtihipha chakaona liata a vaw kao lymâ eita, Dr. Thein Htay ta a pahypa Discipleship Training liata pachutuhpa ta vâro a vaw chakao. Thâtihipha Journal mohpathâhpa “Tapô Hmôtan” liatazy article rotuhpa mopathâhpa chhao a vaw châ. Ano he Dr. Tin Maung Tun awnanopa Brethren awnanopa mebâh a châ. Brethren awnanopa tawhta Dai râh, Mindat pai liata thâtihipha tha ta vaw chho ta, misawnari ta vaw chakao awnanopa hluhpi a vaw padua. Cha nota Magawimanu khih liata thohna o liata

hriatuhpa sawchanô Ls. Nian Hau Cing nata a vaw hnei ei ta, sawchano pakha ama vaw hnei. Ama saw moh cha Esthy (Esther) a châ. Chavâta ano he Esthy paw eima ta tyh.

Thâtihpha rai chakaona liata a tha tlô thei via nawpa ta 1989 tawhta Faith Baptist Bible College, Tedim liata Bachelor of Arts in Biblical Studies (BABS) a vaw chu ta 1993 liata a vaw patlô. Biehraichuna a vaw patlô tawhta ta Discipleship Training, Myinchian liata pachutuhpa ta a hria pazo lymâ. Burma râh zydua liata thâtihpha chho lymâ ta, Burma râh liata “Pachhana Thâtihpha” chhona liata moh lâlua kawpa pakha ta a vaw châ. Thâtihpha chho ta khitlyna liata a hrona a vaw hmâ tupa vâta vâdua kawpa ta a lapinô (Esthy nô) cha vah hropa a vaw hnei sai haw. Pastor pakha, nôpawpa châ ta, lapi leipa a y awpa viasazy ta ama khokhei khao leipa vâta Dai râh liata Misawnari a chakao haipa Germany zuahnô Pinô Helga nata ama vaw hnei. Cha



tawhta Thâtihpha chhona kyh liata khizaw hmasiepa hawhta Mongyuh reih zy thai awpa a byuh ta, chavâta India râh Bangalore khihpi liata Berean Baptist Bible Bible College (BBBC) liata M.Div nata M.Th cha 2004 liata a vaw patlô. BBBC liata saku hawti pakha ta âchu nga no chhaota Campus chhôn liata

Thâtihpha chhona Crusade vaw tao tyh ta thyutlia hluhpi a vaw pipathisa ei. Bangalore liata a y nota ano hmisâ nata a lyu kawpa Mizo Police molaipa nata moh pathâhpa Pu

Sangliana y ta, Indian chyhsazy ta Pu Sangliana ngyu na tah ei ta, ama aw chheipâ nga tyh.

India râh tawhta achuna a vaw patlô tawhta Yangon liata khihsana a vaw patôhpatia ta, Myanmar Grace Mission (Discipleship nata Leadship Training) a vaw padua. Grace Theological College (GTC) Bible school liata Principal ta vâropi a vaw chakao. 2016 July liata Midwest Seminary of Biblical Theology tawhta Doctor of Theology (D. Th) a vaw hmô. Yangon liata o pha kawpa miakha chhao a hnei. Vadua kawpa ta a lapinô Pihnô Helga a vaw pahâsai haw heih. Chahrasala, Khazohpa ta lapi pha kawpa pie heih ta, 2020 liata Karen zuah Aye Pa Pa Moe nata ama hnei.

Ano he Myanmar râh chhôn zydua nata râh khôtho lâ zydua liata Thâtihpha chhotupa rônahpa a vaw châ. Ano he Khazohpa ta a hmâpa chyhsa rônahpa a châ. Lâhu râh liata a y nota a thihpa pathyu ta, Dai râh liata sahro (Seih) a tlâh leipa taihta thla pachhasa ei ta a vaw patlâh hawpa a châ. Burma râh Sate mia 7 nata Region mia 7 taih thâtih-pha chho khai hawpa châ ta, râh hropa Thailand, Singapore, Malaysia, Australia, USA zy taihta Thâtihpha a phuahpa a châ. Vâdua kawpa ta Covid-19 hripipa a khôkhâh thei khao leipa vâta a chakao tyhpa Paw Khazohpa hnohta August 22, 2021 noh zâ 10:35 liata a pahâ haw. A siesaipa lapinô, saw samohpa nata chhôn-kha zy chô liata taokhei hmeiseih pita, a siesaipa chakao-nazy châta thla eima chhakhei. Ano cha a chakaona patlô haw ta, chavâta he KTA ano eima my thei leina “Thâtih-pha chhona liata Pasaipha” tahpa ta record eima tao.

A PAHNO KHEI RAIRIE AWWA ÂBYUH!

Pro.p. San Lwin

(KTP Secretary)

Biehmiapa

Mara rân he phu nata py hluh chaina rân a châ vaw tah sila, ei reih chhei aw va ma? Kih miakha liata satlia pakha cha py liata Executive Member saita miachaki taih a vaw chakao thlâh hâ. He hawhta chakao pabaoh hluh tuna he rairuna chhao hluhpi a y thei aw. Eima rân liata py thokhazy cha py moh deita anano ta, member-zy he miakhâpa sai ama châ. MTP, MSA nata KTP zy he cha hawpa py-zy eima châ. MTP nata MSA he phu nata py moh châ ta, KTP he Awnanopa py pachhaipachhua hpa a châ. Chavâta MTP, MSA nata KTP zy he a pahno kheirairiena eimâ byuh!

Achhôngbiezy

MTP, MSA nata KTP tahpa zydua motto nata achhih-thana dâh hnei chyu pita, cha hawhta chakao pita, cha hawhta eimâ chhihtha. MTP motto “Chieleipazy Viasa,” MSA motto “Eima rân nata chipho châta,” nata KTP motto “Krista châta Lyuchâpa” (2Kaw.5:20). MTP heta rân chhông chieleipa zy deichhyna he chakao via pachai ta, MSA heta achuna tawhta eima rân nata chipho hmâsiena kyh pachâ via ta, KTP heta thyutliazy hrozie nata nôchâ taopathina a chakao via. MTP, MSA nata KTP zy he kheihawpa kyh liata ma cha ku nata phei tlai ta rai ahria kheithai pita, kheihawpa kyh liata ma cha vaw châ thei vei. Cha tlai cha py siezie a vaw nanona a châ.

Atahmâ hlâ eima râh (Myanmar) buana cha eima sapa nata thlahpa zydua taih miah parao khai ta, râh kyh a pachâ viapazy châta cha amô/azia thei lei, niedo thei leina taihta palôh apasa â chhina daihti a châ. Sawhkhâ liata hriatuhpa hluhpi zy chhao ama rai puasaipa ta CDM (Civil Disobedience Movement) liata amâ vaw pahla. Thokhazy cha rai pabâpa vaw châ haw eita, thokhazy cha rai chalihsapa ama vaw châ (Sawhkhâ ta hla pie mâh khao vei). Chazy hryta thokhazy cha eima râh liata y awpa âmo châta thlalôh âchhinh khao leipa vâta ama yna suzy puasaipa ta ama paipathla hôlô. Râh buana hryta Covid-19 tily eithôhna miah su heih ta eima duasu zydua miah a parao khai. Atahmâ ta eima peimawh chaipa cha a pahno kheirairiena he a châ.

1. Daoh ta sôhpaliepazy chhao hmodah chalei thaipa a châ khao leipa vâta ama hnei chhôhpa hmozy cha a mâ ama vaw pasâh bâ. Achaleituhpazy (Zawpi) chhao taka hmôna a rairu kawpa vâta riethei âvaw chhinh hmeiseih. Ahmô chheina a y tlamaw lei nawpa ta azuatuhpazy nata achaleituhpazy chhao he a pahno kheirairiena âbyuh.
2. Sawhkhâ raihriatuhpa thokhazy cha CDM tao eita, thokhazy cha Non-CDM ama tao. Non-CDM thokhazy chhao he Pheisai Sawhkhâna ama khokheipa vâta châ leipa ta Sawhkhâ rai pabâ awpa ama chipa vâta a châ. Chin State liata Sawhkhâ rai chhao he anao kawpa ta hmô theipa a châ leipa vâta Sawhkhâ raihriatuhpa pakha châta CDM tao awpazy he rainaopa la châ hlei ngyu vei. Cha hawhta atahmâ hlâ CDM tao lei awpa

chhao he ngiaryh achhih thai hra vei. Sawhkhâ raihriatuhpazy châta la chaikie nata sophie likawh liata ypa tluta a châ aw. CDM ataopazy nata Non-CDM ataopazy chhao he a hmô chheina a y tlamaw lei nawpa ta a pahno khei rairiena âbyuh!

3. Atanoh Myanmar râh buana vâta riethei atao viapazy he keimo (MTP, MSA nata KTP) member-zy ama châ chai. Thokhazy cha KTP daimaw a chalih thlâh hâ tahpazy ama pachâ thei aw. KTP zy ta eima thyutliazy châta thlah a chhâ lymâ! Sawhkhâ kyh nata azaopa a châ vâta khotalai kawpa ta rai ahria thei leipa deita a châ. He tlai he rei chiepa hawhta “MTP, MSA nata KTP zy he khei hawpa kyh liata ma cha ku nata pheii tlai ta rai ahria khei thai pita, khei hawpa kyh liata ma cha vaw châ thei vei. Cha tlai cha py siezie a vaw nanona a châ” eima tahpa kha a châ thlyu aw. KTP he Awnanopa py pachhaipachhuaipa a châpa vâta eima pahno khei thai awpa a pha kaw aw.

Biepachhâna

MTP, MSA nata KTP zy he pykhapa tluta eima châ vâta alyna liata alykhei awpa nata nôpona liata nôpo khei rairie awpa he eima tovyuh nata taovyh a châ. MTP alyna cha MSA nata KTP zy alyna châ hra ta, MTP palôhpasana cha MSA nata KTP zy palôhpasana a châ pyly hra. Atahmâ daihti he keimo MTP, MSA nata KTP (WE ARE ONE) hawpazy “eimâ taokhei theina chyua ta a taokhei sila, eimâ hrialâh thai khao leina kyh zydua liata la a pahno khei rairie awpa ta sy!

ACHHYNA LIATA MAOPHAONA A HNEIPAZY PAHNO AWPA**Pastor Serô***(KHP Secretary)***Biehmiapa**

Achhyna cha khizaw chyhsa zydua ta ama hrona liahmari ta ama hnei chyu. Saiso, pasipasawpa nata hraoleipa ta pachâ ngâh hra v'ei. Eima chhyna dâh a lyu tlâ vei hra sala chyhsapa hrona a pahnetuh chaipa nata bie a hnetuh chaipa a châ. Ama chhyna tawhta ama pachu lymâ chyu hawhta ama hrona liata hmô theipa a châ. Nôpaw hro liata biereina tawhta nata a tyuduana kyh kheihawhpa zydua he eima sawzy ta miah amâ chu lymâ hrapa a châ. Atanoh awnanopazy ta eima hro miah a pahnetuh chaipa he Khazohpa bie khohna nata bie hrokhei lymâna a châ aw va ma? Eima noh to hrona he ta eima Krizyhna nata ngiapâna cha a paluahsa lymâ, ngiapâna cha hmô theipa ta eima hrona liata â luah. Eima pahnop a he rei leipa ta y thei mapi, a pahno chaipa chhao eima châ khoh kaw tyh.

Chahrasala Khazohpa bie, eima hrona châta eima ngiah chaipa deikua pahno khoh mapi, papeisa hra mapi, saw zy pachu awpa a chhuah hra mapi. Hawtizy achhyna kyh liata eima diathlâ lymâna kyh liata nôpaw nata awnanopa chhithatuhpazy ta maophaona eima hneina kyh a pahnopasia awpa a peimawh kaw. Chhôhkha nôpaw nah sawnawh zy akaona nata awnanopa nôpaw nata sahlaozy akaona pha viapa hnei awpa nata zyhna kyh liata chhithana liata a hmeiseih via lymâ awpa he KTA ta achhuahna a châ.

1. Apatôhpatiana phapa hnei awpa

Achhyna kyh liata awnanopa nôpawzy cha Khazohpa nata awnanao zawpi likawh liata tovyuh ahneituhpazy ama châ. Chhôhkha nôpawzy chhao hawtizy nata Khazohpa likawh liata maophaona tovyuh lai kawpa ahneituhpa ama châ hra. Nôpawzy hro liata kyh to châta patôhpatia thaina hneina he chhôhkha nata awnanopa sahlao châta hmo peimawh kawpa a châ. Chyhsa palôh a pathyusa kaw tyhpa cha **apatôhpatiana** he a châ. A pakhy na daihti nata awnanopa noh peimawhpazy my lei awpa nata bie pipazy chhao pahno awpa a châ. Chhôhkha thata a pasyupakâ theipa nôpawzy nata awnanopa nôpawzy cha ama chhôhkha nata sahlaozy cha kyh to liata mopavâ, nahpavâpa ta ama y tyh. Sermon reituhpa nata apakhyna liata maophaona ahneituhpazy ta thata ama pachhuahpanoh (preparation) awpa âbyuh hmeiseih. Pkn.. thokha ta keima daihti hnei awpa vaw my haw nata biehra vaw reih hmâ leipa nata tahpa amâ (ready) leina kyh tawhta bie ama za pathao tyhpa cha zawpi hnabeiseihna a paraona tiao a châ.

He hawhta ama mâ leina kyhzy tawhta bie rei pathaonazy a hluh tita zawpi achhyna o tlô khohna zy a lei haw tyhpa a châ. Eima chhôhkha liata chhao nôpawzy ta atanoh cha nohpeimawhpa a châ, a pakhy awpa a châ, pôhpa pathaisa awpa nata chysia a tobinazy hnei awpa ta pasyupakâna he chhôhkha liata â byuh hmeiseihpa a châ. Palôh thathyu kawpa ta achhyna o lâ chhôhkha sawnawh zydua chhaota hmaohkha ta ngai thei awpazy khokheina biezy rei lymâ awpa a byuh.

Achhyna tovyu ahneituhpazy tawhta ama mâ leina kyhzy, saiso pasichhihpa bie reinazy nata thyu chamaohnazy ahluk tita ahmeiseih leina a tlôkhei. Chavâta chhônkhâ nata awnanopa nôpaw zydua ta awnanopa zawpi sahlao châta tha a patlô leipa bie reina nata atyuduana hpz he achyh via thei nawpa ta a pachhuah panohna, apatôh patiana (Preparation) phapa hnei via lymâ awpa a châ.

2. Bie nata Hro azaona kyh

Achhyna daihti liata chairperson, chakaona tovyuh hropa ahneituhpa nata sermon ahneituhpazy cha zawpi nata Khazohpa likawh liata maophaona ahneituh chaipa zy ama châ. Khazohpa ta keimo tovyuh ahneituhpazy hmâpa ta zawpi sapa nata thlahpa tlâhna byhnâ nata zawpi bie hmeiseihpa liata laiseih nawpa bieparu â phuah lymâpa a châ. He hawhpa daihti ta tovyuh ahneituhpa keimo ta eima sosi leina kyh, chysia atobizie nata apie-alyuna zydua he zawpi lâta ao leipa ta bie a reih tahpa my lei awpa a châ. Eima biereipa nata eima hrozie zydua he mopazih lymâpa eima châ. Eima sermon na bie nata eima nohto hro, eima sawzy hro, eima lahpinô hro...hpz dua he azao-khina liahsa ta a hnei khaiपा a châ. Chavâta Khazohpa vyuhpa ta a reipa eima châ tahpa apahnopasiana hnei awpa eima peimawh kawpa a châ.

Chhituhpazy pita Châbu zy rei daithlâlei awpa, atyu-dua dâhzy pahno awpa, bie reiziezy, hawrawh hmâziezy chhao pahno awpa a peimawh hmeiseih. Eima bie reipazy ta daihti nata ahmie leipa, rei chheinazy hluh, sorry tahpa hluh, thyuchamaohnazy hluh pahneisao awpa duahmozy ahluk tita achhyna o ngai awpa chhao taihta thachhienazy a

pahneisa theipa a châ. Chavâta awnanopa sahlao hryta thyutlia nata hawtizy ta achhyna tlô awpa he ngiabâna rai hnei khao vei ei, daihti chhôn zydua liata chhao bie nathlie khohna hnei khao leipa eita mobile zy mota daihti ahmâpa ama hluh via lymâ haw bâpa a châ. Eima hro nata ahmiepa Khazohpa biezy rei awpa nata eima reipa hawhta ataotuhpa châ thei achhuahpa avaw peimawh kaw bapa he khizaw hmasiena ta miah pahaona chhao a châ haw.

Biesyhpahmaona

Chhônkha sawnawh nata awnanopa sahlao zydua chhao ta achhyna nata ama hro a pazaosatuha châ thei awpa ta nôpawzy ta chakaona maophaona tovyuh eima hneipa a châ. He kyh liata apatôhpatiana phapa hneina ta tao chhei, rei chheina chyh via awta chyhsa palôn apathyu hmeiseihpa a châ. Hawtizy nata awnanopa sahlao zy achhyna liata tlô khohnazy ama hrona hnabeiseina Khazoh pa liata ama hnei via thei nawpa ta keimo maophaona ahneipa zy pita eima pachhuahpanoh pha via awpa a châ. Keimo khohdâh hlâta eima sahlao nata eima chhônkha hawtizy ta amâ ngiah/ khoh tahpa pahnopa ta pie thei awpa nata pabie thei lymâ awpa cha nôpawzy maophaona a châ. Eima maophaopa rai apahnopata, rai hlaotloha ta pangoh thei awpa ta tiama awpa a châ. He kyh liata eima diathlâ tyh tita sahlao nata eima chhônkha hawtizy hro liata hro dâhphina ama hnei tyhpa a châ. Chavâta keimo nôpawzy ta Krista chakaona liata chyhsazy châta byhna châ thei nawpa nata hro dâhphipazy apapaisatuha châ thei hra n'awpa ta eima chakaona liata liahsa hro ahlâna hmeiseipa hnei suh vy.

Steven Jobs Ryuhi Bie

Rev. Victor Ve U

Moderator

Steven Jobs he (IT) ama tahpa Information Technology a hmô papuatuhpa a châ. Ano he kô (56) a pha hai nota a thi hawpa a châ. A hneirôhna dollars millions (7000) cha a siesai haw. A thi chy liata bie a reipazy he zy tlâ awpa bie zy a châ. He hawhta a reih.

Chiehlei kawpa ta ei ziana rakhô tawhta ei hrona daihti liata khizaw ei za hmâna hneirôhnazy, hlaotlohna zydua he ei thi khai tawhta kei châta hraoleipa sai a châ khai aw. Mawtaw hnei chi ta a haotuhpa (Driver) na hlâh thei na, chahasala na pasa tita na vyuhpa ta a pasa awpa a hlâh thei khao aw va chi. Khizaw hmodâh he lei hrasala tlua ta hmô heih theipa a châ, miakha dei na hneipa na hrona deikua cha alei haw khiah hmô heih thei khao aw va chi. Chavâta tlâhna awpa nama sasyh a khasia mah y.

Sâhkha mâpa sanâh nata sâhzakha mâpa sanâh zy he ta na peimawhpa daihti a cha chho khai thei chy thlâh hâ aw na. 100 Lakhs mâpa mawtaw nata 1000 Lakhs mâpa mawtaw zy heta na chhuahna su a cha tlôkhei thei chy thlâh hâ aw na. O hmo kawh ngâsâpa liata y hrala, o hmo buah ngâsâpa liata na y pa chhao na thina daihti liata ft 6×3 pyly na to aw. Vâzawlau ticket mâ ru viapa tlyma mâ nao viapa chalei hrala na accident tita thi pyly chy awpa a châ. Biehmeiseihpa na pahno awpa ei khoh kawpa cha alyna hmeiseihpa he khizaw sôh nata piah ta chalei theipa châ vei tahpa he a châ. Alyna hmeiseihpa

cha kyhpachâpa vîasa lokhyzy nata tlyma hlazy sa, pahneisaisonapa bie rei tahpa he a châ.

Ei vaw rei khoh via heihpa cha hawtîzy he kheita ma a hneirôh aw tahpa he pachu leipa ula, kheita ma aly kawpa ta a hro aw, khih a sa aw tahpa he pachu muh vy. He hawhta nama pachu khihtacha a ma vaw laiseih tita hmo pasô thaina a ma vaw hnei aw. Chyhsa phapa pachâsa theina awpa lâthlôh he chyhsa chyhta deita ama pahno. Khizaw liata na vaw pihna daihti liata chyhsa tota ama châ lypa hawhta na thina daihti liata chhao moto palysa hra mah y. Khizaw liata dawhty pha chaipa mo pacharu ei pahnopa zy cha;

1. Noh sapa
2. Apahâna
3. Mathlai leina taihta raihriana
4. Sasyh a ngâna
5. Vîasa hneina nata
6. Niedo thaina zy he a châ.

 Aly viapa ta chhôhkha chakaona

Rev. Mai Ki

Chhôhkha member zydua eima chhôhkha liata eima ly kaw sai awpa he chhôhkha châtaw (Goal) a châ. Chhôhkha member zydua aly theina deikua Chhôhkha apaduatuhpa Khazohpa bie liata a y. Khazohpa ta chhohkha apadua chhana hawhta chhôhkha a chakaotuhpa zy deita aly viapa ta chhôhkha ama chakao lymâ thei aw. Khazohpa ta chhôhkha apadua chhana zy cha

- 1) Abao raihri, akao raihri, akhy raihri awpa, kyh a pachâ rairi awpa (At 2:18, Zhn 13:34)
- 2) Tovyuh a pie raihri awpa (1kaw 7:3)
- 3) Tlokhuh ta Khazohpa kyh pachâ awpa (Ryc 6:5, Mk 12:30)
- 4) Sasyh kyh a pachâpa hawhta vaih kyh pachâ awpa (Mk 12:31)
- 5) Raihria awpa nata vai awpa (At 2:15)
- 6) Chi hluhpi pathla awpa (At 1:28)
- 7) Sawzy Khazohpa bie ta mohôh pachu lymâ awpa (Ryc 6:7, Ephe 6:4)

Chhôhkha he Kyhpachana- Khazohpa ta apaduapa vâta Khazohpa alyna hmiapasapa ta chhôhkha chakao lymâ suh vy.

Khihtlâh Ihmyna (Community Sustainability)**Rev. Mai Ki**

Khihtlâh liata Krista hro hneina he Khihtlâh ihmyna thabya a châ. Khihtlâh tahpa cha apahrâtuhpá chyhsazy, apahrâtuhpazy hmâpa hmotaopa nata chheipahzy, ama pahrana ti nah tlâhzy, achhihthana phohrozy, ama ngiapâna nata taozie zy pahlyhpakhypa he a châ. Ihmyna tahpa cha“ tah pazao theina” y zie hnei ta siena awpa liata siepazao theina, chakao awpa lâthlôh liata chakao pazao theina, a hmâna dopa liata hmâpazao theina zy ta a py thei awpa a châ.

Khizaw nata a chhôn liata a ypa zydua he Khazohpa taopa sai châ ta Krista vâta nata Krista châta taopa sai a châ. Khazohpa ta ato zydua he Krista vâta aryhpa ta a papsapa he Khazohpa palôh châ ngaitana a châ (Kaol. 1:15-20). Ato châta daihti raopa châ ta avâ ry ta a to châta daihti rypaohpa a y. (Bic 3:1). Ato he ama daihti chyu liana cha ângia ngai tapa ta tao ta (Bic 3:11). Khazohpa ataopa maih cha apha kawpa ta pahno ta (At 1:31). Khazohpa ta ataopa maih cha a y kôzaw thlâh hâ awpa tahpa ei pahno. Khapa hmâta baichha theipa châ leipa aw ta thy theipa chahra aw vei. Chyhsapa ta Khazohpa a chi theina awpa ta ataopa châ tlôh. Hmo a y haipa he a y chiehpá kha châ ta hmo a vaw y awpa chhao a y chiehpá kha a châ. Khazohpa chata a lei ha chiehpá kha a vaw papsa lymâ heih.(Bic 3:14-15). Chyhsa ta a y zie ta ABEIPA apalya khiah ta cha akha khaipa la chhao taih a ryhpata apa-y sa tyh (Bis 16:7).

Khazohpa bie liata asia ngaitapa ta a to zydua dihzai (design) ataotuhpa nata ataopa maih achhuahna siano kawpata ataopa cha Khazohpa a châ zie a sia kawpa ta eima hmô haw. Chyhsapa nata hmotaopa zydua he Khazohpa leipa ta a y thai lei awpa ta taopa châ pi ta Khazohpa chhaota deita ta alei liata tlyma, avâ liata tlyma aly thai awpa ta taopa eima châ. Khazohpa bie hawhta pina, laiseihna nata thina cha chyhsapa châta ihmyna a châ. Khazohpa bie hawhta sa to, ngâ to, tho to, paw to – pih ta pôh ta, pathei ta a thi heihna chhao cha a ihmyna a châ hra. Ti nah tlâh, saikao zy, noh, thlapa nata awhsi zy, hmôtheipa nata hmô thei leipa zydua chhao ataopa Khazohpa bie hawhta a yna deita he a ihmyna châ ta lo-iapa zydua a liali theipa nata liali theileipa zydua chhao Khazohpa ta bie hawhta a daihti ta apathlaina cha a ihmyna a châ. Khazohpa palysa ta khakhaipa chhao â ryh thei.

Eima khihtlâh ihmyna cha Khazohpa bie liata a y. Eima khihtlâh nata eima râh hmasiena chhao Khazohpa bie liata a y. Eima khih nata râh ihmy awpa nata hmasie awpa ta Khazohpa ta a Thlahpa Pathaiha maniah a pie. (1 kaw 12:7). He ihmyna nata hmasiena bie thabypa he my lei nawpata “Hmasiena Hla Hrohpa”- abaichha khotha maihta bai chha awpa nata he hlasana maih ta Paw Khazohpa, Sawchapawpa Khazohpa, Thlahpa Pathaiha Khazohpa cha su to liata a y tahna athei thlâhna châ ta cha-châh la ei thoh-ku cha baih, chavei la ei thoh ku chabaih na chô ta sa lymâ suh vy. Krista hro cha Kyhpachâna, siana nata adona hro châ tlôhta.

Hmasiena Hla Hrohpa

Doh is D

1) Eima râh hmahsie thei nawpa ta, Beipa Bie hmâh
chyuh suh vy!

✘ | m : r.d | m : r.d | m . r :-m|d-: | d. t: d. d |
r : r | m:-

Eima râh hmahsie thei nawpata Beipa Bie hmâh
chyuh suh vy!

| m : r.d | m : r.d | m . r :-m|d-: | d. t: d. d | r
:m | d:- | -: Fine

Khazohpa hmia, pasah leipa, Hmasiena cha,
chichhihna

| m.d: m.m | r.d: r.m | d.r: m.m

| m.d:m

Kyhpachâna, a hlao leipa, Hneirôhna cha,
leidiana

d.r:r.m | r.r: r.m | r.d:m.m | r.r:m

Hroziephapa, a hnei leipa, Thaisohna cha,
buabâna. Aw... Chavâta...

| r.r:r.m | r.r:r.m | m.d: m.m | m.m:m

| m:m.r | r :-D.S

**Hla bie nata ao phituhpa: Rev. Mai Ki, Executive Director, TSD
Solfa botuhpa: Mch.Situ, Hyutuhpa, Vaihpi Local Church,
Lailenpi**

CHICHEINA KYH ACHUNA

(Volume 1)

Mch. Zabet Htan

Director of TPA-SDTC, Lailenpi

Chichei/lyutaotuhpazy pahno awpa (NPK) alei pahâhpa kyh Khazohpa ta a chyhsazy niedo ama hmô n'awpa châta alei he maniah a piepa a châ. Châhrasala, daihti hluphi/kô seihipi ama vaw hmâ nahta cha, alei pahâhpa chhao a vaw chhâ laih haw hra. Chatah leipa chhaota, alei su a yna maih liata chicheina châta hmâ theipa châ hra vei. Chicheipa he chikha nata chi kha amâ nanopa hawhta aleipahâhpa ama nie khohna yzi chhao a lyu khai hra vei. Thokô nata âhnalasi zy he chyhsapa nahta ama lyu kaw hra. Chanô dyhchâ ta a saw phao hlâ nie tyhpa, saw phao daihti aokhohpa, a saw pi khai tawhta nie awpa tahpa ta ananopa hawhta chichei thokô chhao cha hawh hrana chata a châ hra. Thokô nata âhnalasi zydua he ama laiseih n'awpa, ama pathei n'awpa, ama thatlô n'awpa nata hriiah ama pahnie thei n'awpa zy châta nie pahâhpa ama pie awpa a byuh hra. Hawtipa vaw pih ta alaiseih n'awpa ta pati pahâhpa photo ama pie tyhpa hawhta, thokôzy chhao he pie cheingei awpa a byuh.

Keimo ta eima tao tyhpa cha: thokô he a lo deita loh pi ta khâsia khao ma pi. A chheipâh sihnâ pasithai rakha deita he eima tao tyh. Thokô a paw paw daihti hlâta liata pie awpa, a thei lâta a vaw lie nahta pie awpa nata a thei paphasa n'awpa ta pie awpa nata alei pahua (မြေဆွဲခြင်း) zydua he tao khao mapi. A thei pathei nahta

nie awpa deita he eima mokhâh tyh. Reikhohpa cha, thokô-chicheipa he khâsia leipa ta a pasô ta tlaô eima pasô tyh. Hnei pi ta, a theilâpa nie/hmô awpa zi hmô thei mah pi. Chavâta, chicheipazy a daihtita liata ama nie awpa nutrients (အတာရမ္ပာ) he pie awpa a châ.

Chichei a palaiseihsapâ Nutrients (အတာရမ္ပာ) pho (21) rachhôh a y. Cha (21) hry liata a peimawh chaipa sa (3) a châpa: Nitrogen (N), Phosphorus (P) nata Potassium (K) zy kyh he ei vaw palâsa. N ama tahpa Nitrogen he a kô, a hna, a chiah zy laiseihna lâchhâh rai a hria via. A paw, athei pathei hlâ daihti liata N ahluh viapa aleipahâhpa pie awpa a châ. P ama tahpa phosphorus he apaw nata athei lâchhâh tha patlôpa a châ. A paw paw daihti pha chy ta liata nata a thei alai hla chhôn P a hluh viapa aleipahâhpa he pie awpa a châ. Kama tahpa Potassium he a thari tha patlôna, a chopaw/adaw thapatlôna, a thei pathlôhsana, a thei pangiasana, a chi (Quality) paphasana nata hri-iah pakha theina hpz. hmotaotheina a hnei. A thei a vaw pathei nah ta; a thei paphasa, a chi paphasa theina awpa ta K a hluh via a hneipa aleipahâhpa pie via awpa a châ. He pho (3) NPK zy he packing bag taopa ta ama vaw papua nahta cha: N:P:K tahpa ta ama ro tyh. Thei thai viana ta:

- 45:0:0 tahpa ropa a châ khiah; N = 45, P = 0, K = 0 tahna a châ.
- 0:45:0 tahpa ropa a châ khiah; N= 0 , P=45, K = 0 tahna a châ.
- 0:0:45 tahpa ropa a châ khiah; N=, P=0, K=45 tahna a châ.

- 15:15:15 tahpa ropa a châ khiah; N=15, P=15, K=15 tahpa châ ta, he hawpa ta ropa a châ khiah (၁၅ ywfvnf) ama tah tyh. NPK a khopa ta taopa a châ.

A hropa nutrition zy cha:

1. Carbon (C), Hydrogen (H), Oxygen (O) he pho (3) zy he châ ta, thlih nata nohsapa tawhta hmôpa a châ.
2. Calcium (Ca), Magnesium (Mg), Sulphur (S), Silicon (Si) he sa (4) zy a châ.
3. Micronutrients ဖြည့်စွက်မြေဩဇာ (piechhipa) ama tahpa pho (11) a y. Cha zy cha: 1)Boron (B) ဘိုရောန်း (a thei, ahna palaisa, ahna pachhasa, a thei kua a pachhasa, a rarosa) 2) Giffarine ဂျစ်ဖ်ဖားရင်း (A hna, a thei a paseihsa), 3) Chlorine (Cl) ခလိုရင်း, 4)Manganese (Mn) မဂနီစီယမ်အောက်ဆိုဒ်, 5) Iron (Fe) သံ, 6) Zinc (Zc) သွပ်, 7)Copper (Cu) ကြေးနီ , 8) Molybdenum(Mo) မိုလီဘီနာမ်, 9) Nickel (Ni) နိခ်ကယ်လ်, 10)Selenium (Se) စီလဲန်နီယမ် ,11) Sodium (Na) ဆိုဒီယမ်, zy nata cha hleikhôpa ta protein ama tahpa (အသားဓါတ်) zy chhao he thokôzy châta a peimawh kawpa sai a châ.

Chicheipa châta aleipahâhpa (nutrients) a piepa hmozy liata NPK âhlaona %

Moh	N	P	K
Sarupa phaoh	3 - 4	15 - 23	0.68
Viachao ie	1.10	0.40	1.06
Naw ie	0.97	0.60	1.66
Ma E (Mie chawpa) ie	1.03	0.66	0.64
Baletlaupa (paupau) ie	1.54	14.28	0.60

Pasopakana

KrizyhpāTlāawna

Vamo ie ငုံးချေး	9.28	2.31	1.91
Awh ie	2.42	6.29	2.11
Tyhphy ie	1.02	1.84	0.52
Vao ie	2.69	2.24	1.12
Sihna hrohpa (သစ်ရွက်အစိမ်းရောင်)	1.64	0.14	0.43
Beidâh (Hyacinth) ဒါပင်	1.55	0.45	2.80
Viaphaodi ဖွဲ့နွဲ့	1.9 - 2.3	4 - 6	1.9
Vephao hrâh စပါးခွံ	0.46	0.26	0.70
Vephaohrâh meihei စပါးခွံမီးသွေး	0.00	0.15	0.81
Sawphao ကောက်ရိုး	0.59	0.08	1.72
Ngachawpa phaoh ငါးခြောက်မှုန့်	9-10	2.13	1.2 - 2.7
Chhâmei kôrupa ပြောင်းဖူးရိုး	1.78	0.25	1.53
Chhâmeih kô ပြောင်းဖူးပင်	0.71	0.11	1.38
Baro kô ပဲပုပ်ပင်	2.71	0.56	2.47
Baro kua ပဲပုပ်အခွံ	7 - 10	2.13	1.12 - 2.7

Remarks: He hawhta hmo (raw) liata NPK a hlaona percentage (%) ama thliena he mo pakha nata pakha thliena a lyu khai thai vei. Achhâpa cha, hmo chhaichhi ama lapa liata NPK a hlaona anano haw tyhpa vâta a châ.

He liata Viachao-ie liata a ypa N % he sihna hrohpa, sihna raohpa nata bietie-barozy liata a ypa N % hlâ ta a chyh viapa ta eima hmô. A chhâpa cha; sihnazy liata a ypa vitamin zy viachao thisaih lâta a lie ta, alaibâhpa dei a vaw papuapa vâta a châ.

Chemical (Dâdu) aleipahâhpa he na hmâ khiah ta cha: a lei parao/pachâsa ta, na sadô or na lyu cha châh seihipi hmâ khao aw vachi, na siesai khoh ha bâ aw.

TAOKHEINA

Atakô 2021 liata Covid-19 ta eima râh nata chipho maniah vaw hria ngâsâ ta, eima hrona taih maniah a vaw pahlei. A eih viapa ta Yangon liata a pahrapa eima ngiapâ lâhpa thokha hrona taih a vaw pahlei haw. Ary liata moh eima palâsa thokhazy cha Mara mo nata azaona a hneipazy ama châ. Amozy he palôhru hmeiseih ta taokhei pita, ama siesaipa chhôhkhazy Khazohpa ta ypâ ei sala chhitha mawh ei se tahpa thla eima chhâkhei.

1. Pinô Sezi: Ano he Lialaipi khih puapa châ ta, Pastor Biengethai (Hloma) nata ahnei eita, Yangon liata Khazoh-pa ama chakao. July 10, 2021 noh ta maniah a pahasai.
2. Rev. Min Lwin: Ano he Sayama Sihleizi (Lialaipi) vahpa châ ta, Yangon liata chakaotuhpa ama cha. Ano he Yangon 9 Mile Church liata Pastor a chakao haipa a châ. Burmese nawh liata thâtihpha chhotuhpa châ ta, Awnanopazy, Sunday Schoolzy, Chyhsa baobyuhpazy chakao ta a bao tyhtuhpa a châ. Ano he Kalay liata Covid-19 vâta rairu a tyhpazy baona a chakaona kyh liata Covid-19 vaw veih ta Yangon liata chhôhkha hmia chhao a hmô hmâ leipa a pina Madalay liata July 19 liata Paw Khazohpa hnohta a vaw pahâ haw
3. Rev. G. Biak Lian Sun: Ano he Neidaupaw (Pasai khithieh) sawchanô vahpa a châ. Rivival Baptist Church liata pastor a chakao haipa a châ. Hakha khihpi liata Khazohpa a chakao hai nota July 21, 2021 noh Khazohpa hnohta a pahâ haw.

4. Pastor Zawbau: Ano he Hloma khih puapa châ ta, Lialaipi zua Sayama Pawtie nata a hnei eita, Yangon liata Khazoh-a rai a chakaopa ama cha. Ano he True and Living Church awnanopa a vaw padua. Shwe Pyin Thar Churches Fellowship liata President achakao hai nota July 27, 2021 noh taotuhpa Khazohpa hnohta maniah a pahâsai haw.
5. Rev. Dr. Lung Nem: Ano he a Matupi pai Vakai khih puapa châ ta, Rev. Dr. Vâbi sietanô nata a hneipa châ ta, Yangon liata Khazohpa raihria a chakaopa a châ. The church of the Lord Jesus Christ awnanopa padua ta, New Life Children chhao a chakaopâ hra. Kô 53 a pha hai nota vâdua kawpa ta July 29, 2021 noh ta maniah a pahâsai haw.
6. Rev. Myat Kyaw: Ano he Puhpa Paokô (Rarai) sawchanô vahpa châta Mandalay liata Khazohpa rai a chaopa ama châ. Minge Christian Church liata pastor a chakao haipa châ ta, August 4, 2021 noh ta lapi nata sawzy mo 5 siesaipa ta maniah a pahâsai haw.
7. Rev. Dr. Hre Ling (Pahrai): Ano he Aru khih puapa châ ta, Yangon liata a chakaona a hneipa a châ. Emmanuel Children Centre padua ta harapazy deichhyna rai a hriapa a châ. August 11, 2021 noh ta a chhônkhha lapi nata saw pano siesaipa ta a chakao tyhpa Khazohpa hnohta maniah a pahâsai haw.

8. St. K. Bierona: Ano he Puhpa Kheingai (Tisi), Myintkyina liata khih a sa haipa sawchapaw seihaipa châ ta, Yangon YPEC Children Home liata hriatuhpa a châ. Mawtaw haoh thaipa a châ. Yangon Mara Covid-19 Rescue Team liata amâ bôchhâpa châ ta, Covid-19 veihpazy hro pachhana rai a hria hai nota Covid-19 a vaw hmô pathlei ta, August 16, 2021 nohta maniah a vaw pahâsai haw.

9. Rev. Dr. Paul K. Kyaing: Ano he Hlomo khih puapa châ ta, Yangon liata Khazohpa raihria vâta khih a sa haipa a châ. Thâtihpa chhona liata “Pasai Pha” tahpa ta moh a phao theipa Thâtihpa chho rônahpa pakha a châ. Eima pasai leina chôta August 21, 2021 noh ta maniah a pahâsai haw.

10. St. Kha u Ano he Machâ Rawma (Yangon) Sawchapawpa cha ta, Yangon liata khih a sa haipa ama châ A daihti lei kawpa ta liata July 23, 2021 noh Khazohpa hnohta maniah a pahâsai haw.

11. Puhpa Kôhla; Ano he Satu Ngephe khih puapa châ ta, Paletwa liata khih a sa haipa a châ. Eima pasai leina chô ta August 26, 2021 noh ta Khazohpa hnohta miah a pahâ sai haw.